

VIÉURE SA VIDO

LOU FELIBRE DI CIGALO

Prefàci

Siéu d'aquéli, iéu, qu'amon de repas 'n bèu libre, de revèire un bèu tablèu, de trouva 'n bèu païsage e de se coungousta di bèuta deja visto; mai ame peréu de rescountra de pajo nouvello pleno de gràci e de pouèsio, de tounba sus uno pinturo óuriginalo qu'empresciouno pèr soun gàubi particulié, de countempla 'n amiradou que s'èro pancaro trouva davans mis iue e de leissa moun amo s'abandouna i dóuci ravacioun qu'en elo coungreio tout ço qu'es bèu e ço qu'es noble.

Es tóutis aquéli plesi divers, es aquélis emoucioun variado que vèn de me semoundre Viéure sa vido, un libre nouvéu de moun brave ami, l'arderos felibre di Cigalo.

Trove, dins aquelo oubreto, de bèlli pajo, de bèu tablèu, de bèu païsage que rescontre pas pèr la proumièro fes e que me boulegon pamens a l'entime: acò se coumpren tout soulet. En nous parlant de soun oustalet de la carriero Monte-Cristo, de l'Escolo de la mar, de la Freirié prouvençalo, di tambourinaire de Santo-Estello, di fèsto perpignanenco, dóu roumavage de la Santo-Baumo, dóu gàubi e de l'escuei de soun amirablo e regretado chatouno, la plumo dóu felibre, que se laisso mena simplamen pèr l'esmougudo de soun cor que se souvèn, fai rèn autre que de retraire, mai de retraire en tra sincère e delicat, uno moulounado de sensacioun qu'en sa coumpagno e qu'en coumpagno de bèn d'àutris ami que nous soun car, sentiguère iéu-meme au cours d'aquésti darriéris annado. Es bèn naturau dounc qu'ague revist emé la pu grando joio aquéli souveni qu'ai counserva dins lou meïour cantoun de moun amo e que se i'èron tout-bèu-just un pau ennivouli: li raconte sabourous que n'en fai l'escrivan li remeton au-jour-d'uei en pleno enlusido: acò 's delicious !

Mai lou libre dóu felibre di Cigalo m'a desvela peréu bèn de païsage de iéu incouneigu, bèn de souveni siéu que soun pèr iéu uno revelacioun e qu'en nous fasènt vèire, coume se i'erian, de sceno deleitouso, de tablèu meravihous, me meton coume de fournigo dins li cambó e, dins l'amo, l'ardènto frenetego de reviéure lis ouro douço qu'eu a viscu. L'inaguracicun dóu recàti prouvidenciau dóu lau d'Alos, la messo sublimo di pastre de Chalùfi, la proucessioun dóu Val-Espir e li permenado magnifico de Roumo e de Catalougno e tóutis aquélis escourregudo qu'an mena noste ami dins li rode li plus resplendènt à la recerco d'ami dóu Felibrige, cresès-ti pas que podon douna lou regrèt de lis agué mancado emai l'envejo de li refaire, dins la mesuro dóu poussible ?

Eh ! bèn, pèr li repaire, à pau de frès, — fauto d'un autre biais, — avèn que de legi e relegi lou galant libre qu'es aqui: coume se disié dins uno cascadeleto dóu tèms passa, acò, si, qu'es pinta !

Car la plumo de noste ami pinto vertadieramen.

Aquéli descripcioun frapanto de soun libre nous soun facho de-mai en uno lengo aucunamen coumpassado, en uno proso naturalo e coulanto e acò n'en es pas lou mendre merite.

La proso es raro, bèn trop raro, à moun avis, dins la literaturo prouvençalo: certo li grand mèstre Roumanille, Mistral, e pu tard Fèlis Gras e Batisto Bonnet, e tambèn noste egrègi ami, lou capoulié Valèri Bernard, e quàuquis autre, nous an douna de pajo incoumparablo; mai coume acò, dins nòsti biblioutèco, es aclapa souto de moulounado de vers !

La pouèsio pamens se vestis pas unencamen e fourçadamen de la formo ritmico e rimado; es pas l'àbi soul que fai lou mouine ! e, pèr ma part, trove qu'un di libre li mai pouèti que i'ague es justamen escri en proso, en uno proso granado, gaio, armouniouse e dindanto, e se

rescontro qu'es plus particulieramen aquéu librihoun precious e superbe: En Mountagno, dóu regreta Don Savié de Fourviero, que m'es rapela, em' uno veritablo afiscacioun, pèr lou libre nouvèu dóu majourau di Cigalo.

Aquéu Viéure sa-vido emé l'Aprendissage de la vido, qu'a pareigu i'a quàuquis annado deja, formon uno richo meissoun e m'es avis que forço felibre farien bèn de prene dóu meme gran pèr si semenço de l'an que vèn.

L'autour, éu, se countènto d'óufri soun brèu de sagesso à soun felen ama: aqueste pichot, veramen, pourrié segre un pu marrit eisèmples.

Dr J. FALLEN.

Aubagno, lou 7 de Jun 1919.